



Annað undankvöld Músíktilrauna fór fram í gær í Hörpu en þau verða alls fjögur talsins. Fjórar sveitir hafa spilað sig inn á úrslitakvöldið sem fram fer 1. apríl en það eru hljómsveitirnar Hewkii, Módest Grúv, Between Mountains og Vasi. Hér sést á sviðinu sveitin Between Mountains en meðlimir hennar koma frá Suðureyri og Þingeyri. FRÉTTABLAÐIÐ/ERNIR

Aðkoma þýska bankans til málamynda

Rannsóknarnefnd segir aðkomu Hauck & Aufhäuser að kaupum í Búnaðarbanka hafa verið til málamynda og voru viðskiptin fjármögnuð í gegnum aflandsfélag á vegum Kaupþings. Bankinn tók „enga fjárhagslega áhættu“. Engar blekkingar, segir Ólafur Ólafsson.

VIÐSKIPTI Aðkoma þýska bankans Hauck & Aufhäuser að kaupum á 45,8% hlut ríkisins í Búnaðarbankanum 2003 var „aðeins til málamynda“ og voru kaupin fjármögnuð í gegnum aflandsfélag á vegum Kaupþings sem skömmu síðar sameinaðist Búnaðarbankanum. Þetta kemur fram í gögnum sem rannsóknarnefnd Alþingis hefur aflað sér að því er fram kemur í bréfi nefndarinnar frá 13. mars sem Fréttablaðið hefur undir höndum.

Í bréfinu segir að Hauck & Aufhäuser hafi verið „tryggt skaðleysi af þátttöku sinni í þessum viðskiptum“. Þannig sýni gögn og upplýsingar rannsóknarnefndarinnar að „dagana áður en skrifað var undir kaupsamning Eglu hf. og annarra lögaðila (það er hins svonefnda S-hóps) um kaup á hlut íslenska ríkisins í Búnaðarbankanum hf. 16. janúar 2003, stóð hópur manna að gerð tveggja samninga varðandi hluti Hauck & Aufhäuser

í Eglu hf. á milli annars vegar Hauck & Aufhäuser og hins vegar aflandsfélagsins Welling & Partners Limited, skráðu á Bresku-Jómfrúareyjum, sem Kaupþing hf. útvegaði til að standa að samningnum.“

Þeir sem stóðu að gerð samninganna voru m.a. nokkrir starfsmenn Kaupþings á Íslandi og Kaupþings í Lúxemborg. Í bréfinu segir að ekki verði séð „að íslenska ríkið eða aðrar stofnanir þess hafi á nokkru stigi

verið upplýst um gerð þessara samninga, efni þeirra og áhrif.“

Samkvæmt gögnum tók bankinn „enga fjárhagslega áhættu“ með þessum viðskiptum. „Fjárhagslegir hagsmunir bankans af þeim hafi takmarkast við þóknun sem samið var um samkvæmt samningunum en öll hagnaðarvon af umræddum hlutum í Eglu þess í stað verið áskilin Welling & Partners Limited.“

Í svarbréfi Ólafs Ólafssonar, fjár-

festis og forsvarsmanns S-hópsins, til nefndarinnar er því neitað að „blekkingum [hafi] verið beitt gagnvart ríkinu“. S-hópurinn hafi boðið hæsta verð og að ríkið hafi fengið kaupverðið greitt að fullu. Sigurður Einarsson, fyrrverandi stjórnarformaður Kaupþings, segir að hann „reki ekki minni“ til Welling & Partners Limited sem nefndin telur að Kaupþing hafi útvegað til að standa að samningum vegna viðskiptanna. – hae / sjá síðu 4

Bótakrafa vegna gangagerðar

SAMGÖNGUR Gerð Vaðlaheiðarganga olli því að bæjarlækurinn við Nes í Fnjóskadal þornaði upp og rafstöð sem nýtt var til upphitunar og lýsingar varð óvirk. Eigendurnir krefjast bóta.

„Til að koma til móts við ábúendur budum við þeim að tengja þá við rafmagn og hitaveitu og að við myndum greiða kostnaðinn við það. Við teljum málinu lokið,“ segir Valgeir Bergmann, framkvæmdastjóri Vaðlaheiðarganga. – sa / sjá síðu 2



Valgeir Bergmann, framkvæmdastjóri Vaðlaheiðarganga hf.

Biðlisti lengist en fáir í fangelsi

FANGELSISMÁL Af 56 plássum í fangelsinu á Hólmsheiði eru aðeins 30 pláss nýtt. Stendur því nær helmingur fangelsisins auður. Biðlisti fanga eftir afpláunun hefur lengst frá því nýja fangelsið var byggt og tekið í notkun.

Páll Winkel fangelsismálastjóri segir það langtímaverkefni að vinda ofan af boðunarlistanum sem hefur myndast síðasta áratug.

Páll kveðst þess fullviss að fangelsið á Hólmsheiði muni hafa jákvæð áhrif í þeim efnunum til lengri tíma.

„Pláss er fyrir 56 fanga í fangelsinu miðað við 100 prósent nýtingu. Nýting umfram 90 prósent er hins vegar ekki raunhæf,“ segir fangelsismálastjórinn.

– sa / sjá síðu 6

Fréttablaðið í dag

SKOÐUN Guðmundur Andri Thorsson vill að við notum íslenskuna af örlæti en ekki sem valdataeki. **13**

SPORT Sunna Tsunami vann sinn annan atvinnumannabardaga og mamman fór á taugum. **16**

LÍFIÐ Tónlistin hefur hjálpað söngkonunni Karítas Hörpu í gegnum erfiða tíma. **30**

PLÚS 2 SÉRBLÖÐ • FÓLK
• FASTEIGNIR

*Samkvæmt prentmiðlakönnun Gallup apríl-júní 2015



N1 kortatilboð

EIN MEÐ
ÖLLU

199 punktar
Fullt verð 390 kr.



N1

VERTU LAUS VIÐ
LIÐVERKI



NUTRILENK™
GOLD

www.artasan.is

Aðkoma Hauck & Aufhäuser aðeins til málamynda við kaup á Búnaðarbanka

Þátttaka þýska bankans Hauck & Aufhäuser að kaupum á 45,8% hlut ríkisins í Búnaðarbanka var „aðeins til málamynda“. Kaupin voru fjármögnuð í gegnum aflandsfélag á vegum Kaupþings. Þetta sýna gögn rannsóknarnefndar sem birtir skýrslu sína síðar í þessari viku. Sigurður Einarsson, fyrrverandi forstjóri Kaupþings, segir sig ekki „rekja minni“ til aflandsfélagsins.

Hörður
Ægisson
hordur@frettabladid.is



VIÐSKIPTI Aðkoma þýska bankans Hauck & Aufhäuser að kaupum á 45,8 prósentu eignarhlut ríkisins í Búnaðarbanka Íslands í ársbyrjun 2003 var í „reynd aðeins að nafni til“ að mati sérstakrar rannsóknarnefndar Alþingis og voru kaupin fjármögnuð í gegnum aflandsfélag á vegum Kaupþings. Samkvæmt gögnum sem nefndin hefur aflað sér verði ekki annað séð en „að fjárfesting Hauck & Aufhäuser í gegnum Eglu hf. í, og síðar með sama hætti eignarhald á, hlutum í Búnaðarbankanum hafi [...] aðeins verið til málamynda og tímabundið“, auk þess sem þýska bankanum hafi verið „tryggt skaðleysi af þátttöku sinni í þessum viðskiptum“.

Þetta kemur fram í bréfi rannsóknarnefndarinnar frá því 13. mars síðastliðinn sem Fréttablaðið hefur undir höndum. Í bréfinu segir að gögn og upplýsingar nefndarinnar „sýna að dagana áður en skrið var undir kaupsamning Eglu hf. og annarra lögaðila (það er hins svonefnda S-hóps) um kaup á hlut íslenska ríkisins í Búnaðarbankanum hf. 16. janúar 2003, stóð hópur manna að gerð tveggja samninga varðandi hluti Hauck & Aufhäuser í Eglu hf. á milli annars vegar Hauck & Aufhäuser og hins vegar aflandsfélagsins Welling & Partners Limited, skráðu á Bresku-Jómfrúareyjum, sem Kaupþing hf. útvegaði til að standa að samningnum.“

Þar var um að ræða svonefndan söluréttarsamning og hinn samningurinn varðaði veð- og tryggingaráðstafanir. Þeir sem stóðu að gerð þessara samninga, að því er kemur fram í bréfi nefndarinnar, voru meðal annars „nokkrir starfsmenn“ Kaupþings á Íslandi og dótturfélags þess í Lúxemborg og auk þess starfsmenn Hauck & Aufhäuser, einkum þá Martin Zeil, þáverandi forstöðumaður lögfræðideildar bankans.

Í bréfinu segir að ekki verði séð „að íslenska ríkið eða aðrar stofnanir þess hafi á nokkru stigi verið upplýst um gerð þessara samninga, efni þeirra og áhrif, sem og atvik varðandi síðari framkvæmd þeirra.“ Kaupþing sameinaðist



Tilkynnt var um sölu á 45,8 prósentu hlut ríkisins í Búnaðarbanka til Eglu hf. í janúar 2003. FRÉTTABLAÐIÐ/GVA

Búnaðarbanka þremur mánuðum eftir sölu á hlut ríkisins. Rúmum tveimur árum eftir að þýski bankinn eignaðist hlut í Búnaðarbankanum í gegnum félagið Eglu hf. hann búinn að selja allan hlutinn til annarra hluthafa innan S-hópsins en á meðal þeirra sem leiddu þann hóp var Ólafur Ólafsson fjárfestir.

Alþingi samþykkti í júní í fyrra þingsályktunartillögu um að aðkoma Hauck & Aufhäuser að kaupum S-hópsins á 45,8 prósentu hlut ríkisins fyrir um 11,9 milljarða yrði rannsökuð af sérstakri rannsóknarnefnd sem hefði víðtæk heimildir til að kalla eftir upplýsingum. Sá sem fer með rannsóknina er Kjartan Bjarni Björgvinsson héraðsdómari en gert er ráð fyrir að skýrsla nefndarinnar verði birt opinberlega á miðvikudaginn.

Fram kemur í bréfi rannsóknarnefndarinnar, sem var sent á ýmsa einstaklinga sem höfðu aðkomu að kaupnum og þar sem óskað var eftir frekari skýringum þeirra rétt áður en vinnu við skýrsluna lyki, að samkvæmt gögnum nefndarinnar hafi þýski bankinn „enga fjárhagslega áhættu tekið“ með þessum viðskiptum. „Fjárhagslegir hagsmunir bankans af þeim hafi takmarkast við þóknun sem samið var um samkvæmt samningunum en öll hagnaðarvon af umræddum hlutum í Eglu hf. þess í stað verið áskilin gagnaðila bankans að samningunum, það er fyrrgreindu aflandsfélagi, Welling & Partners Limited.“

Þá bendir rannsóknarnefndin á að hún hafi einnig undir höndum gögn sem varpi ljósi á framkvæmd samninganna um sölurétt og veð- og tryggingaráðstafanir og ráð-

stafanir sem þeim tengdust, meðal annars af hálfu starfsmanna Kaupþings á Íslandi og Kaupþings í Lúxemborg. „Má þar einkum nefna viðskipti milli Hauck & Aufhäuser og Welling & Partners Limited með umrædda hluti í Eglu hf. sem fóru fram á grundvelli ákvæða samninganna á næstu misserum eftir gerð þeirra og fjárhagslegt uppgjör sem átti sér stað á hagnaði aflandsfélagsins vegna þeirra viðskipta,“ segir í bréfinu.

Í svarbréfi Ólafs Ólafssonar til nefndarinnar, sem Fréttablaðið hefur einnig undir höndum, er fullyrt að „engum blekkingum [hafi] verið beitt gagnvart ríkinu“ þegar hluturinn í Búnaðarbanka var keyptur. S-hópurinn hafi boðið hæsta verð fyrir hlutinn og ríkið hafi fengið kaupverðið greitt að fullu.

Segist ekki hafa notið ávinnings af viðskiptunum

Sigurður Einarsson, fyrrverandi stjórnarformaður Kaupþings, segir í svarbréfi sínu til rannsóknarnefndarinnar 20. mars að hann „reki ekki minni“ til aflandsfélagsins Welling & Partners Limited sem nefndin telur að Kaupþing hafi útvegað til að standa að samningnum sem gerðir hafi verið vegna viðskiptanna.

Hann bendir á að viðskiptin hafi átt sér stað fyrir meira en 14 árum og að rannsóknarnefndin hafi ekki lagt fram nein gögn þegar hann mætti til skýrslugjafar sem gátu skýrt hverju hún væri að leita að. „Ég hef því ekki átt kost á því að staðreyna hvort lýsing málsatvika í bréfi þínu sé rétt.“

Þá segir Sigurður að um starfsemi bankans hafi gilt banka- leynd og að Kaupþing hafi verið umsvifamikill aðili í bæði lána- og afleiðuviðskiptum.

„Ég get fullyrt við þig að ég naut ekki ávinnings af þeim viðskiptum sem lýst er í bréfi þínu. Þá get ég upplýst þig um að ég veit ekki annað en að hinn þýski banki Hauck & Aufhäuser hafi verið hluthafi í Búnaðarbankanum og síðar í sameinuðum banka Kaupþings Búnaðarbanka hf. í gegnum eignarhald í félaginu Eglu hf. Fulltrúi bankans var eftir sameiningu bankanna kjörinn í bankaráð Kaupþings Búnaðarbanka og sinnti skyldum sínum vel í stjórn bankans.“

Þá gagnrýnir Sigurður í bréfinu þá fyrirætlan að skila skýrslu á grundvelli þessara gagna „án þess að hafa einu sinni kynnt þau eða borið undir mig“ og segir að það vekji hjá honum „ótta um að rannsóknin sé hrein sýndarmenska og væntanlegar niðurstöður í skýrslu þinni verði fyrirfram ákveðnar.“



Sigurður Einarsson

VIÐURKENNT ÞJÓNUSTUVERKSTÆÐI OG VARAHLUTAVERSLUN

Ís-Band er umboðsaðili Fiat Chrysler Automobiles (FCA) á Íslandi.

Tæknimenn okkar eru með áratuga reynslu af viðgerðum á flestum gerðum bifreiða og hafa hlotið sérþjálfun frá FCA.

Mikil lofthæð gerir okkur kleift að sinna viðgerðum á húsbílum, atvinnubílum og stórum pallbílum.

Við tökum vel á móti þér. Tímamantanir í síma 534 4433.



ÍSABAND
ISLENSK-BANDARÍSKA EHF. BÍLAUMBOD

Íslensk-Bandaríska ehf - Verkstæði og varaahlutaverslun - Smiðshöfða 5 - 110 Reykjavík - Sími 534 4433
thjonusta@isband.is - www.isband.is - OPID VIRKA DAGA KL. 07:45 - 18:00